

## 臺北詩鈔

### 七言古體

#### 烏來杜鵑

寶島奇姝生烏來，北勢溪上榮華開；何意翡翠建成後，淹沒名花流塵埃。  
卅載珍叢根葉摧，可憐香斷粉蝶哀；遙想岩生挺立日，紅映滿山繡成堆。  
蒼天不忍絕芳材，春心一片未成灰；人工復育今重盛，定把東風力挽回。

#### 行路難

北城春色景暄妍，大道能通青雲天；我今開門直欲去，環顧世途心茫然。  
捷運通達無迷路，繁華卻多迷心處；徒知爭逐空尋歡，春不誤人人自誤。  
浮生奔走路漫漫，人情練達嘗炎寒；官家修路無已時，方識人間行路難。  
行路難，行路難；壯心高跨千里遠，蹊徑自我足下寬。

### 五言古體

#### 黃金屋

昔勸五經讀，書藏粟千斛；朱門何用此，高居黃金屋。  
玉堂錦團簇，其中長福祿；巷人飢簞食，富犬厭梁肉。  
冬月風厲肅，猶有無完服；問彼暖裘士，可曾見冷縮。  
豪富利競逐，豈聞貧者哭；天上隔人間，似遙近怵目。  
此言致民牧，親民更惠育；抖擻秉風雷，興革勁且速。

### 七言律詩

#### 紅梅白梅

造化天工巧絕倫，雙嬌賦得迥丰神；風臨玉面霜中月，燭照酡顏醉後春。  
縞袂拂時明有雪，絳紗繫處麗無塵；一般香潔凌寒性，相賞豈惟迷色身。

#### 關渡自然公園看放風箏有感

仰面稚兒歡樂同，紙鳶點點入蒼穹；心原驕傲頻迎日，體更逍遙能御風。  
直蹈天階隨上下，橫開雲路任西東；縱然飄舉青霄裡，猶嘆於人掌握中。

#### 賞櫻

山中綻放領春騷，自負凝妝壓李桃；萬蕊娉婷含露淚，一林爛漫著霞袍。  
日臨灼爍姿猶艷，英落繽紛韻自高；美質邀來人競賞，何曾埋沒隱蓬蒿。

### 士林夜市

良宵未許禁金吾，輻輳通明夜不孤；街市三更聲尚沸，劍潭一站客頻趨。  
香飄飲饌人間路，目滿琳琅天上衢；久在長安知米價，猶驚販果貴於珠。

### 讀「快雪時晴帖」忽憶友

廿八驪珠麗映輝（註），龍蛇落紙化芳菲；寸心晴日明如昨，尺素雪天溫勝衣。  
快意人生須一笑，柔情歲月未單飛；紅塵海闊知交在，相憶何愁會面稀。

**註：「快雪時晴帖」是王羲之雪後寫給朋友慰問的短信，共二十八字，古人稱譽為二十八驪珠。**

### 中秋烤肉寄友

湛湛清輝舒碧空，勻分秋色北城中；平生不負看花眼，一夕何堪落葉風。  
霜露橘酸皮已綠，人情炙熟炭當紅；與君共月晴依舊，水遠山高處處同。

### 傅鐘

臺大翼門仰昔賢，椰林夾道鬱參天；地植樟柏馨香茂，鐵鑄鐘臺志業堅。  
學術自由傳是日，文人風骨憶斯年；傅鐘廿一音仍響（註），若個沉思佇此前。

**註：傅鐘二十一響，為紀念傅斯年校長名言：「一天只有二十一小時，其餘三小時是用來沉思的。」**

### 北投溫泉

無用羅衾不擁裘，北投湯浴勝春遊；奔泉瀉玉藍田出，煮石縈煙紫闕浮。  
滑潤倦容中外客，溫融衰鬢古今愁；感今經濟艱難日，肯向人間贈暖流。

### 大龍峒孔廟

夫子廟堂誰問津，大成殿內歷秋春；曾傷時薄應無道，未嘆德孤還有鄰。  
木鐸已寒聲抑抑，泮池猶碧水粼粼；龍峒疇曩文風盛，能效采芹今幾人。

### 士林官邸菊展

豔質霜姿傾北城，孤標定是廣寒生；士林葉落秋宵靜，官邸花開芳苑晴。  
濁世誰偕歸隱逸，高情自厭笑逢迎；深知都市虛榮地，冷蕊堅持晚節清。

### 板橋林家花園觀稼樓（註）

蓬萊仙境舊園林，一步清遊一步吟；苔老瑤階經歲久，樹森瓊閣鎖春深。  
憫農當諭耕鋤苦，觀稼休圖賞玩心；徵盡良田興宅第，倚樓回顧恨難禁。

**註：「觀稼樓」又稱小樓，為二層樓建築，當時於樓上可眺望觀音山下遼闊十里的田園莊稼，阡陌相連，故稱。**

### 淡水馬偕博士銅像

哲賢銅像暮微茫，跪禱諄諄望彼蒼；無悔青衿辭故國，自甘白髮獻他鄉。  
杏林霖雨屯山峻（註），馬帳春風淡水長；遺澤應同霞綺在，無邊神采照斜陽。  
註：「屯山」係指大屯山系，馬偕博士銅像背後觀音山亦屬此山系。

### 晚登 101 大樓

樓似秋高高欲登，憑軒一眺意超騰；忘機心杳纖雲逝，出世情閒明月昇。  
窗簇琳琅千里目，夜舒錦繡萬家燈；莫嗟來處原卑下，勉力攀躋最上層。

### 擎天崗草原

健步許顏橋上來（註）；高崗芳野好徘徊；千畦碧毯風梳櫛，萬丈翠裘春剪裁。  
冉冉遙擎穹浩蕩，離離廣被嶺崔嵬；勝於桃李尋常色，綠滿平川逞妙才。  
※許顏橋：可通往擎天崗，1896年由商人許清顏出資興建。

### 遊陽明山午後小憩

浪踪半日似漂萍，茗館偕朋暫歇停；湯鼎細烹花乳白，風簾閒捲草山青。  
參差丘壑窺情趣，澹泊茶煙養性靈；流轉韶光依舊是，中年心境憶曾經。

### 過龍山寺

萬華古寺盛名傳，頂禮觀音思澹然；紫竹林間常說法，白蓮座上已通禪。  
銅龍蟠柱丹臺立，彩鳳飛簷碧漢連；復感長安居不易，祈澆甘露到民邊。

### 青草巷（註 1）

昔人採藥此流芳，店肆紛綸聚弄堂；仍舊坊隅尋漢劑，曾經梵宇乞仙方（註 2）。  
繁華已逐紅輪晚，淳樸猶聞青草香；購得一杯茶細味，遙懷往歲好風光。

註 1：位於西昌街之小巷。早期草藥店分布在龍山寺四周，光復後逐漸在今日的西昌街聚集，「青草巷」因此成型，當時尚有「救命街」之稱。

註 2：早期人生病往往會先到龍山寺求得藥籤再到青草巷抓藥。

### 過貴陽街（註）

昔譽街衢第一名，恍聞前世鬧騰聲；川流船舶何時息，雲集紳商一度榮。  
無奈昌隆隨去日，不堪蕭索踏歸程；依然河水煙波色，脈脈送人無限情

註：貴陽街舊稱蕃薯市街（歡慈市街），艋舺因河利之便，成為北市最早發展地區。而龍山寺後的貴陽街則是最早發展的街道，遂被稱為「台北第一街」。

### 剝皮寮老街

風華重啓剝皮寮，國片猶掀新浪潮（註）；存得殘樓追昨日，修成完璧薦今朝。  
牆磚年久胭脂暗，亭腳景幽春夢遙；原似徐娘餘態好，佳時韻致未全銷。

註：電影「艋舺」主要場景即在剝皮寮街道取景拍攝，因為「艋舺」一片更帶動當地的觀光風潮。

### 絹絲瀑布

層巒何處匿蠶眠，柔吐絹絲苔壁前；誰伴深林同隱逸，自居空谷獨纖妍。  
廣寒宮裡嬋娟子，姑射山頭冰雪仙；寄語封姨須裊裊，莫教吹逝散如煙。

## 七言絕句

### 貓纜

人間三月景清嘉，貓纜凌空瞰物華；若使車行無盡處，相偕春色到天涯。

### 竹子湖白海芋

竹子湖中意態真，清新一向絕凡塵；素顏不用庸脂粉，羨煞紅妝多少人。

### 故友寄安平蜜餞

鵝毛千里悅然收，知我南人作北遊；蜜餞口嘗心亦觸，酸甜滋味是鄉愁。

### 紀州庵文學森林

幽情不用訪名山，雅趣風流藏此間；夏木陰陰開卷處，暫拋俗務事清閒。

### 桃花

一樹桃花陌上春，多情不惜立風塵；綺紅嬌嬾千枝動，無限東風笑路人。

### 有懷

已過團圓三五期，姮娥消瘦卻因誰；人間易得長生藥，唯有相思不可醫。

### 打字

打字漸成平日事，揮毫已是舊衷腸；非因筆墨難爲用，恐寫惡詩汗紙張。